

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINSKI SUD U BANOVIĆIMA  
Broj: 127 0 K 077274 24 K  
Banovići, 18.02.2025. godine

## U IME FEDERACIJE BOSNE I HERCEGOVINE

Općinski sud u Banovićima, sudija Sanela Čajić, uz sudjelovanje zapisničara Begzade Šehić, u krivičnom predmetu protiv optuženog V.S. zbog krivičnog djela – Neovlaštena proizvodnja i stavljanje u promet opojnih droga – iz člana 238. stav 1. Krivičnog zakona Federacije Bosne i Hercegovine u sticaju sa krivičnim djelom – Neovlašteno nabavljanje, držanje i prodaja municije– iz člana 73. stav 3. Zakona o oružju i municiji Tuzlanskog kantona (Službene novine Tuzlanskog kantona broj 17/2015), a sve u vezi sa članom 54. istog Zakona, po optužnici Kantonalnog tužilaštva TK broj: T03 0 KT 0105078 23 od 29.03.2023.godine, koja je potvrđena dana 05.07.2023. godine, nakon održanog glavnog pretresa dana 14.02.2025.godine, u odsustvu kantonalnog tužioca, optuženog i njegovog branioca donio je i javno objavio dana 18.02.2025. godine sljedeću

### P R E S U D U

#### Optuženi:

V.S., sin H. i majke T., rođene H., rođen ... godine u T., nastanjen u K., u ..., općina K., “(...)“, do sada osuđivan, i to:

“[...]“ ispušteni podaci iz kaznene evidencije

#### Kriv je

#### Što je:

1. Dana 07.07.2021. godine oko 21,25 sati, u B., iako je bio svjestan i znao da se radi o opojnoj drogi čije neovlašteno posjedovanje radi dalje prodaje zabranjeno, što je i htio, protivno članu 4, 19 i 20 Zakona o sprečavanju i suzbijanju zloupotrebe opojnih droga („Sl. glasnik BiH“, br. 8/06), kod sebe držao radi dalje prodaje **jednu žutu PVC vrećicu** okruglog oblika u kojoj se nalazilo 4,855 grama praškaste materije, koja materija u sebi sadrži opojnu drogu “heroin“, a “heroin“ je Listom o utvrđivanju spiska opojnih droga, psihotropnih tvari i prekusura proglašena za opojnu drogu na Tabeli I Liste opojnih droga pod brojem 10, („Službeni glasnik BiH br. 8/06 od 07.02.2006. godine“), **jedno otvoreno pakovanje tablete sa natpisom „Suboxone“** ukupne mase 0,285 grama, koja materija u sebi sadrži psihotropnu tvar “ buprenorfin“, a “ buprenorfin“ je Listom o utvrđivanju spiska opojnih droga, psihotropnih tvari i prekusura proglašena za psihotropnu tvar na Tabeli III Liste psihotropni tvari pod brojem 10, („Službeni glasnik BiH br. 8/06 od 07.02.2006. godine“), **te u putničkom motornom vozilu marke „Audi“, tip „A4“,** registarskih oznaka ..., vlasništvo T.M., koje je istog dana koristio, **držao jedan smotuljak** sa 0,202 grama biljne materije, koja biljna materija potiče od biljne vrste Cannabis sativa(L)-konoplje, a Cannabis sativa(L)-konoplje sadrži tetrahidrocannabinol (THC) iz kojih se može dobiti opojna droga koja je je Listom o utvrđivanju spiska opojnih droga, psihotropnih tvari i prekusura proglašena za opojnu drogu na Tabeli I Liste opojnih droga, , pod brojem 13 („Službeni glasnik BiH br.

8/06 od 07.02.2006. godine), te **jednu digitalnu vagu sa tragovima biljne i praškaste materije, i 2 komada smotuljaka sa tragovima biljne materije materija** koje praškaste materija u sebi sadrže opojnu drogu "heroin", a "heroin" je Listom o utvrđivanju spiska opojnih droga, psihotropnih tvari i prekusura proglašena za opojnu drogu na Tabeli I Liste opojnih droga pod brojem 10, („Službeni glasnik BiH br. 8/06 od 07.02.2006. godine“), a koje biljna materija potiče od biljne vrste Cannabis sativa(L)-konoplje, te Cannabis sativa(L)-konoplje sadrži tetrahidrocannabinol (THC) iz kojih se može dobiti opojna droga koja je je Listom o utvrđivanju spiska opojnih droga, psihotropnih tvari i prekusura proglašena za opojnu drogu na Tabeli I Liste opojnih droga, “), pod brojem 13 („Službeni glasnik BiH br. 8/06 od 07.02.2006. godine).

2. Dana 07.07.2021. godine oko 21,25 sati, u B., u **putničkom motornom vozilu marke „Audi“, tip „A4“,** registarskih oznaka ..., vlasništvo T.M., koje je istog dana koristio, protivno članu 12. stav 2. u vezi stava 1. tačka b) i članu 15. Zakona o oružju Tuzlanskog kantona („Službene novine TK“ broj 17/2015), iako svjestan da je zabranjeno nabavljanje i držanje oružja i municije bez odobrenja nadležne policijske uprave i bez važeće isprave o oružju i municiji, a što je i htio, bez odobrenja nadležne policijske uprave nabavio i kod sebe u vozilu bez važeće isprave o oružju i municiji neovlašćeno držao, **4 komada** municije od čega su 2 komada municije za 6,35x15,8 mm, **1 komad** municije kalibra 9 x 18mm i **1 komad** municije kalibra 9 x 19mm, koja bojeva municija je namijenjena za vatreno oružje kategorije „B“ iz člana 11. stav 1. tačka b). i stav 2. tačke a), b), c) i d.), Zakona o oružju i municiji, a za nabavljanje ove vrste municije je potrebno odobrenje nadležne policijske uprave.

**Dakle,** bez važeće isprave o oružju držao municiju kategorije „B“.

**Čime je** počinio krivično djelo– Neovlaštena proizvodnja i stavljanje u promet opojnih droga – iz člana 238. stav 1. Krivičnog zakona Federacije Bosne i Hercegovine u sticaju sa krivičnim djelom – Neovlašteno nabavljanje, držanje i prodaja municije– iz člana 73. stav 3. Zakona o oružju i municiji Tuzlanskog kantona(Službene novine Tuzlanskog kantona broj 17/2015)u vezi sa članom 54. Krivičnog zakon Federacije Bosne i Hercegovini.

Pa mu sud primjenom navedenih zakonskih odredbi te uz primjenu odredbi čl. 42., 43. , 49., 50. i 51. tačka d. KZ F BiH,

## U T V R Ā U J E

- za krivično djelo – Neovlaštena proizvodnja i stavljanje u promet opojnih droga - iz člana 238. stav 1. Krivičnog zakona Federacije Bosne i Hercegovine, kaznu zatvora u trajanju od 8 (osam) mjeseci,

- za krivično djelo – Neovlašteno nabavljanje, držanje i prodaja municije– iz člana 73. stav 3. Zakona o oružju i municiji Tuzlanskog kantona(Službene novine Tuzlanskog kantona broj 17/2015) u vezi sa članom 54. Krivičnog zakon Federacije Bosne i Hercegovine, kaznu zatvora u trajanju od 2 (dva) mjeseca,

Zatim primjenom člana 65. stav 1. Krivičnog zakona Federacije Bosne i Hercegovine,

## **OPOZIVA UVJETNU OSUDU**

izrečenu pravosnažnom presudom Općinskog suda u Živinicama broj 33 0 092097 22 Kps od 14.07.2022. godine, a koja je postala pravosnažna dana 19.08.2022. godine, kojom je za krivično djelo – Neovlašteno nabavljanje, držanje i prodaja municije - iz člana 73. stav 3. Zakona o oružju i municiji TK, optuženom izrečena kazna zatvora u trajanju od 3 (tri) mjeseca i istovremeno određeno da se ista neće izvršiti ukoliko optuženi u roku od 2 (dvije) godine po pravosnažnosti presude ne počini novo krivično djelo, te optuženi V.S., uzimajući kaznu iz opozvane uvjetne osude u trajanju od 3 (tri) mjeseca kao utvrđenu, primjenom odredaba o sticaju iz člana 54. stav 2. tačka b), a u vezi sa članom 65. stav 1. Krivičnog zakona Federacije Bosne i Hercegovine

## **O S U D U J E**

### **NA JEDINSTVENU KAZNU ZATVORA**

#### **U TRAJANJU OD 1 (jedne) GODINE**

Na osnovu 238. stav 4. u vezi sa članom 78. KZ F BiH od optuženog V.S. se oduzima: 4,835 grama praškaste materije smeđe boje, koja sadrži opojnu drogu heroin, dva dijela tablete bijele boje sa natpisom „Suboxone“, ukupne mase, 0,225 (0,138+0,087), žuta tableta mase 2,815 grama, ne sadrži psihoaktivne supstance, dio tablete žute boje mase 0,373 grama, 0,172 grama biljne materije koja sadrži tetrahidrocanabinol (THC), tableta od firme „Sanofi“ mase 0,092 grama i četiri (4) komada, od čega su 2 komada municije za 6,35x15,8 mm, 1 komad municije kalibra 9 x 18mm i 1 komad municije kalibra 9 x 19mm, koji predmeti će se dostaviti MUP-u TK-a nakon pravosnažnosti presude na dalji postupak.

Na osnovu člana 202. stav 4. ZKP-a F BiH optuženi V.S. se oslobađa plaćanja sudskog paušala zbog lošeg imovnog stanja.

## **O b r a z l o ž e n j e**

Kantonalno tužilaštvo Tuzlanskog kantona podiglo je optužnicu broj: T03 0 KT 0097283 od 29.03.2023.godine, a koja je uređena po nalogu suda dana 26.05.2023. godine, protiv V.S. za krivično djelo – Neovlaštena proizvodnja i stavljanje u promet opojnih droga - iz člana 238. stav 1 Krivičnog zakona Federacije Bosne i Hercegovine, u sticaju sa krivičnim djelom - Neovlašteno nabavljanje, držanje i prodaja municije - iz člana 73. stav 3. Zakona o oružju i municiji Tuzlanskog kantona (Službene novine Tuzlanskog kantona broj 17/2015), sve u vezi sa čl. 54 istog Zakona, kao i protiv R.M. za krivično djelo - Posjedovanje i onemogućavanje uživanja opojnih droga - iz člana 239. stav 3. Krivičnog zakona Federacije Bosne i Hercegovine.

Optužnica je potvrđena dana 05.07.2023. godine, nakon čega su osumnjičeni dobili status optuženih.

Na ročištu za izjašnjenje o krivnji dana 15.02.2024. godine, optuženi su se izjasnili da nisu krivi, pa je zakazan glavni pretres.

Dana 06.02.2025. godine sud je donio rješenje kojim se postupak razdvaja u odnosu na optužene, a sve iz razloga ekonomičnosti i svrsishodnosti okončanja postupka, a sve u skladu sa članom 33. stav 1. Zakona o krivičnog postupku F BiH, to je postupak u odnosu na optuženog V.S. nastavljen pod brojem 127 0 K 077274 24 K.

Na glavnom pretresu održanom dana 14.02.2025. godine optuženi V.S. je promijenio izjavu i priznao krivnju za krivično djelo koje mu se činjeničnim opisom optužnice Kantonalnog tužilaštva Tuzlanskog kantona stavlja na teret.

Branilac optuženog je u završnim izlaganjima izjavio da je njegov branjenik priznao krivnju, da se isti kaje zbog počinjenog djela, ističući da je isti obećao da isto ili slično djelo neće ponoviti, da se isti trenutno liječi od ovisnosti od opojnih droga, o čemu isti prilaže i dokaze, izražavajući molbu da sve naprijed istaknuto sud cijeni u okviru olakšavajućih okolnosti, uzimajući u obzir i socijalne prilike optuženog, tačnije predlažući da sud cijeni i činjenicu da je optuženi nezaposlen, da je isti otac jednog malodobnog djeteta, da je lošeg imovnog stanja, naručito u pogledu određivanja obaveze naknade troškova postupka, odnosno predlažući da sud optuženog oslobodi obaveze naknade troškova postupka, kao i da prilikom izricanja krivičnopravne sankcije sud razlotri mogućnost ublažavanja iste ispod zakonom određenog minimuma, a kako to zakonska regulativa i dozvoljava, cijeneći sve istaknute olakšavajuće okolnosti.

Optuženi je u završnoj riječi istaknuo da se isti kaje za počinjenje dijela koje se istom stavljaju na teret, uz usmeno iskazano obećanje da isti više neće činiti ista ili slična krivična djela, u cijelosti se pridružujući svim navodima svog branitelja, nadalje optuženi je konstatovao i to da isti trenutno obavlja privremene i povremene poslove, od kojih se izdržava, a od kojih doprinosi izdržavanju i svog malodobnog djeteta, naglašavajući da bi istog obaveza naknade troškova postupka dovela u tešku egzistencijalnu situaciju. Nadalje, optuženi je istom prilikom izrazio spremnost da vlastiti život dovede u normalno stanje, koje podrazumjeva da isti više neće konzumirati narkotička sredstva, niti se na bilo koji način približavati kriminogenim radnjama, naglašavajući da bi istog teža kazna psiho-fizički narušila.

Na održanom usmenom i javnom glavnom pretresu u dokaznom postupku izvedeni su sljedeći dokazi: “[...]“.

Shodno članu 245. ZKP F BiH sud je razmotrio izjavu o priznanju krivnje optuženog V.S. datu na glavnom pretresu dana 14.02.2025. godine, te je utvrdio da je izjava o priznanju krivnje data dobrovoljno, svjesno i sa razumijevanjem, kao i nakon upoznavanja o mogućim posljedicama vezanim za imovinskopravni zahtjev oštećenih i troškove postupka, te je utvrdio da postoji dovoljno dokaza o krivnji optuženog, pa je shodno članu 245. ZKP FBiH prihvatio izjavu optuženog o priznanju krivnje.

U toku postupka Kantonalno tužilaštvo Tuzlanskog kantona na temelju prikupljenih dokaza dokazalo je da su se u radnjama optuženog pod tačkom 1. stekla obilježja krivičnog djela - Neovlaštena proizvodnja i stavljanje u promet opojnih droga – iz člana 238. stav 1. Krivičnog

zakona Federacije Bosne i Hercegovine i pod tačkom 2. optužnice stekla obilježja krivičnog djela - Neovlašteno nabavljanje, držanje i prodaja municije - iz člana 73. stav 3. Zakona o oružju i municiji Tuzlanskog kantona (Službene novine Tuzlanskog kantona broj 17/2015), u vezi sa članom 54. istog Zakona.

Da je optuženi počinio radnje koje mu se optužnicom stavljaju na teret pod tačkom 1. optužnice proizlazi iz sljedećih dokaza.

Iz Naredbe za pretresanje putničkog motornog vozila, broj 127 0 K 077274 21 Kpp od 08.07.2021. godine proizilazi da je postojala sumnja da će se kod optuženog pronaći narkotička sredstva, vatreno oružje i municija, otuđeni predmeti iz prodajnih objekata, kao i drugi predmeti koji bi mogli biti predmet izvršenja krivičnog djela ili poticati iz istih.

Iz Izvještaja i Zapisnika MUP-a TK, Policijska uprava Banovići, Odjeljenje kriminalističke policije, broj: 08-06/13-1-03.3-2541/21/SR od 08.07.2021. godine proizlazi da je prilikom pretresa putničkog motornog vozila marke Audi A4, sive boje, registarskih oznaka ..., a koje se nalazi u vlasništvu T.M., a koje vozilo koristi sam optuženi pronađena je i privremeno oduzeta jedna žuta PVC vrećica, okruglog oblika u kojoj se nalazi nepoznata praškasta materija, jedno otvoreno pakovanje tableta sa natpisom "SUBOXONE" u kojem se nalaze  $\frac{3}{4}$  tablete bijele boje, jedna tableta žute boje i valjkastog oblika, jedan komad žute tablete trouglastog oblika, jedna digitalna vaga smeđe boje, četiri aluminijske folije, od čega su tri prazne, a u jednoj se nalazi nepoznata biljna materija.

Iz Naredbe za hemijsko vještačenje KTTK broj: T03 0 KT 0097283 21 od 13.07.2021. godine proizilazi da je postupajući tužilac zahtijevao vještačenje gore opisanih predmeta koji su pronađeni i privremeno oduzeti prilikom pretresa putničkog motornog vozila koje je koristio optuženi V.S., a koje se nalazi u vlasništvu T.M..

Iz Nalaza hemijskog vještačenja nepoznate materije, MUP, Uprava policije, Sektor kriminalističke policije, Odsjek za kriminalističku tehniku i KDZ, broj: 08-06/3-7-03.6-1-3257/21 od 23.09.2021. godine, koje je izvršeno na osnovu Naredbe za hemijsko vještačenje od 13.07.2021. godine, proizilazi da ispitivana biljna i praškasta materija pronađena kod V.S., i to 4,855 grama praškaste materije smeđe boje upakovane u žutu pvc foliju, dva dijela tablete bijele boje upakovane u otvorenom blisteru sa natpisom „Suboxone buprenofrin/nalokson“ ukupne mase 0,285 grama(0,168+0,117), dio tablete žute boje mase 0,403 grama, digitalna vaga smeđe boje kapaciteta 200 g, preciznosti d=0,01 g, dvije alu folije sa tragovima crne boje, od kojih je jedna u obliku cjevčice, 0,202 grama biljne materije upakovane u alu foliju o nepoznata tableta u originalnom pakovanju od firme „Sanofi“. U pismenom dijelu mišljenja je navedeno da praškasta materija smeđe boje iz pvc folije sadrži heroin, monoacetilmorfin, acetilkodein, papaverin, noskapin, paracetamol i kofein, nadalje je utvrđeno da na vagi postoje tragovi heroina, monoacetilmorfina, acetilkodeina, papaverina, noskapina i paracetamola, kao i tragova tetrahidrocannabinola (THC), odnosno kanabisa-konoplje, uz konstataciju da je heroin nalazi na listi opjnih droga pod rednim brojem 10., tabela I(Službeni list BiH broj 8/06). Mišljenjem je konstatovano i to da dostavljena biljna materija iz alu folije potiče od biljne vrste Cannabis sativa(L)-konoplje, kao i da sadrži tetrahidrocannabinol(THC), navodeći i to da se Cannabis sativa(L)-konoplja nalazi na listi opojnih droga pod rednim brojem 13., tabela I (Službeni list BiH 8/06). U nastavku je konstatovano i to da dva dijela tablete bijele boje iz otvorenog blistera sa nazivom subokson sadrže buprenorfin i nalokson, s tim da se buprenorfin nalazi na listi psihotropnih tvari, tabela III pod rednim brojem 10. (Službeni list BiH broj 8/06).

Iz navedenih dokaza sud je ocjene da je optuženi neovlašteno radi prodaje držao materije propisom proglašene opojnim drogama, te da je bio svjestan da je držanje opojne droge u utvrđenoj količini i vrsti te jedne digitalne vage (jedna digitalna vaga na kojoj je utvrđeno prisustvo tragova heroina i tetrahidrocannabinola (THC) odnosno tragova Cannabis sativa (L) konoplje) i praškaste materije smeđe boje iz pvc folije koja sadrži heroin, kao i biljna materija koja sadrži tetrahidrocannabinol (THC) odnosno kanabisa-konoplje- Cannabis sativa (L) i tableta koje sadrže buprenorfin, a koja supstanca se nalazi na listi psihotropnih tvari, neovlašteno i nedozvoljeno, a koje materije su pronađene u vozilu koje je koristio optuženi, odakle proizilazi zaključak da je optuženi to djelo počinio sa direktnim umišljajem jer je bio svjestan svog djela i htio njegovo učinjenje.

Dakle, nakon operativnih saznanja od strane MUP-a TK da optuženi neovlašteno drži opojnu drogu izvršeno je pretresanje prostorija vozila koje optuženi koristi, a koje se nalazi u vlasništvu T.M., kada je kako to proizilazi iz Zapisnika o pretresanju, MUP, Policijska uprava Banovići, Odjeljenje kriminalističke policije, broj: 08-06/13-1- od 08.07.2021. godine, Izvještaja o izvršenom pretresu, MUP, Policijska uprava Banovići, Odjeljenje kriminalističke policije, broj: 08-06/13-1-03.3-2541/21/SR od 08.07.2021. godine o pretresanju putničkog motornog vozila AUDI A4, registarskog broja ..., koje se nalazi u vlasništvu T.M., a koje vozilo je koristio sam optuženi, kojom prilikom je pronađena digitalna vaga smeđe boje i aluminijske folije u kojoj od jednih se nalazi biljna materija, kako je to na zapisniku i navedeno, koja je potom ispitana od strane vještaka za hemijsko vještačenje, iz čega proizilazi da praškasta materija smeđe boje iz pvc folije sadrži heroin, monoacetilmorfin, acetilkodein, papaverin, noskapin, paracetamol i kofein, kao i da na vagi postoje tragovi heroina, monoacetilmorfina, acetilkodeina, papaverina, noskapina i paracetamola, kao i tragova tetrahidrocannabinola (THC), odnosno kanabisa-konoplje, i da dostavljena biljna materija iz alu folije potiče od biljne vrste Cannabis sativa(L)-konoplje, kao i da sadrži tetrahidrocannabinol(THC), zatim da dva dijela tablete bijele boje iz otvorenog blistera sa nazivom subokson sadrže buprenorfin i nalokson, s tim da se buprenorfin nalazi na listi psihotropnih tvari, tabela III pod rednim brojem 10. (Službeni list BiH broj 8/06).

Optuženi V.S. je na glavnom pretresu kod ovog suda priznao počinjenje krivičnog djela koje mu se stavlja na teret, pa je sud ocjene da je tužilaštvo van svake razumnije sumnje dokazalo da je optuženi počinio krivično djelo na način kako je to opisano u tački 1 optužnice.

Da je optuženi počinio krivično djelo opisano pod tačkom 2. optužnice proizilazi iz sljedećih dokaza.

Iz Izvještaja i Zapisnika MUP-a TK, MUP, Policijska uprava Banovići, Odjeljenje kriminalističke policije, broj: 08-06/13-1-03.3-2541/21/SR od 08.07.2021. godine o pretresanju putničkog motornog vozila marke AUDI tip A4, sive boje, registarskih oznaka ..., a koje se nalazi u vlasništvu T.M., a koje vozilo koristi V.S. proizilazi da je prilikom pretresa vozila pronađen i privremeno oduzet jedan pištolj marke „EKOL FIRAT MAGNUM“, sa isparanim serijskim brojem, sive boje sa crnom oštećenom drškom, i sa umetnutim okvirom u kojem se nalazi jedan gasni metak, zatim jedan pištolj marke „ZORAKI MOD 917-TD“ crne boje, bez vidljivog serijskog broja, sa umetnutim okvirom za municiju i bez municije u istom, kao i četrdeset i jedan komad manevarske municije kalibra 5,56 x 45 mm, dva komada municije za malokalibarsku pušku i dva komada municije kalibra 9 mm

Iz Naredbe za pretresanje broj 127 0 K 077274 21 Kpp od 08.07.2021. godine proizilazi da je postojala sumnja da će se u vozilu optuženog, odnosno u vozilu kojim se koristi optuženi pronaći narkotička sredstva, vatreno oružje i municija, zatim otuđeni predmeti iz prodajnih

objekata, kao i drugi predmeti koji bi mogli biti predmet izvršenja krivičnih djela ili poticati iz istih, pa je sud izdao naredbu za pretresanje na osnovu pismenog zahtjeva.

Iz Potvrde o privremenom oduzimanju predmeta, MUP, Policijska uprava Banovići, Banovići, broj: 08-06/13-2-04.3-168/21 od 07.07.2021. godine, proizilazi da je za gore navedene predmete koji su pronađeni prilikom pretresa kuće optuženom V.S. izdata navedena potvrda.

Iz naredbe za balističko vještačenje KTTK broj: T03 0 KT 0097283 21 od dana 13.07.2021. godine, proizilazi da je tužilaštvo naredilo vještačenje oduzetog pištolja marke „Zoraki MOD 917-TD“, crne boje, bez vidljivog serijskog broja sa umetnutim okvirom bez municije, zatim pištolj marke „Ekol Firat Magnum“ isparanog fabričkog broja, sive boje sa oštećenom drškom i okvir za isti sa jednim gasnim metkom, kao i četrdeset i jedan komad manevarske municije cal 5,56x45 mm i 4 komada municije i to 2 cal.9 i dva za malokalibarsku pušku, kako bi utvrdilo o kojoj vrsti i kategoriji oružja i municije se radi i da li je isti tehnički ispravno, zatim da se utvrdi marku i tip dostavljenog okvira i njegove namjene, kao i dostavljene municije i njene namjene.

Iz Nalaza balističkog vještačenja MUP, Uprava policije, Sektor kriminalističke policije, Odsjek za kriminalističku tehniku i KDZ, broj: 08-06/3-7-03.6-1-3257/21 od 19.08.2021.godine proizilazi da je dostavljeni pištolj poluautomatsko oružje za signalizaciju (startno/signalno oružje), dvostruke akcije, marke „ZORAKI“, model 917-TD, turske proizvodnje(MADE BY ATAK ARMS LTD-ISTAMBUL), sa uklonjenim fabričkim oznakama, kalibra 9 mm P.A.K.(9x22 mm. Njem Pistole Automatik Knall) sa funkcionalnim, pripadajućim okvirom za municiju kapaciteta 17 komada municije kalibra 9 mm. P.A.K. (9x22 mm. Njem Pistole Automatik Knall), a koji je po svojoj naravi kopija i modifikacija austrijskog pištolja marke Glock model 17, uz konstataciju da navedeni pištolj nije prepravljen, osim što je ukloljena fabrička oznaka, zatim je konstatovano da iz navedenog pištolja nije moguće ispaliti bojevu municiju, a isti je u ispravnom stanju. Nadalje u pisanom dijelu mišljenja je konstatovano da dostavljeni pištolj marke Ekol, model Firat Magnum, da dijelimično ukoljenim fabričkim brojevima, kalibra 9 mm P.A.K. (9 x 22 mm, Pistole Automatik Knall), turske proizvodnje, sa pripadajućim okvirom kapaciteta 17+1 metaka i sa jednim metkom u okviru je funkcionalan uz neispravnu kočnicu pištolja, a koji nije osjetljiv na potrese i udare. Nadalje je konstatovano da je pištolj marke Ekol predviđen za ispaljivanje manevarskih/blank metaka kalibra 9 mm P.A.K., kao i da je iz istog moguće i ispaljenje municije sa nadražujućim materijalom, odnosno gasne municije, dok iz istog nije moguće ispaljivanje bojevih metaka, obzirom da na istom nisu registrovani tragovi prepravki. Iz navedenog dokaza proizilazi da je dostavljeno četrdeset i pet komada municije i to četrdeset i jedan komad manevarske/blank municije kalibra 5,56 x 45 mm bez uočenih nedostataka, dva komada bojeve municije kalibra 6,35 x 15,8 mm bez uočenih nedostataka, jedan komad bojeve municije kalibra 9 x 18 mm Makarov, sa uočenim tragom udarne igle blažeg intenziteta, dok iz neutvrđenih razloga nije došlo do ispaljivanja metka i jedan komad bojeve municije kalibra 9 x 19 mm, bez uočenih nedostataka, uz konstataciju da je jedini način da se utvrdi ispravnost dostavljene municije, ispaljivanje svakog metka pojedinačno.

Navedeni dokazi potvrđuju da je optuženi znao da se radi o bojevoj municiji i da je posjedovanje iste zabranjeno, bez prethodno pribavljenih dozvola, te je i htio kod sebe neovlašteno držati, dva komada municije za malokalibarsku pušku i dva komada municije kalibra 9 mm, a koja je ispitana od strane vještaka balističara, iz kojeg proizilazi da 2 komada municije 6,35 x 15,8 mm, kao i jedan komad kalibra 9 x 18 mm Makarov i jedan komad kalibra 9 x 19 mm predstavljaju bojevu municiju koja je namjenjena za vatreno oružje kategorije „B“ iz člana 11.

stav 1. točka b) i stav 2. tačke a), b), c) i d) Zakona o oružju i municiji, za čije nabavljanje je potrebno odobrenje nadležne policijske uprave.

Optuženi V.S. je pred sudom priznao počinjenje krivičnog djela koje mu se stavlja na teret pod tačkom 2 optužnice, pa je sud ocjene da je tužilaštvo van svake razumne sumnje dokazalo da je optuženi počinio krivično djelo na način kako je to opisano u tački 2 optužnice.

Dakle, priznanje optuženog da je počinio predmetno krivično djelo potkrijepljeno je materijalnom dokumentacijom, izvršenim pretresanjem pod nadzorom suda te izvršenim vještačenjem i dostavljenom fotodokumentacijom.

Ocjenom izvedenih dokaza, ličnosti optuženog i okolnosti predmetnog slučaja, sud je ocjene da je optuženi krivično djelo počinio sa direktnim umišljajem, a što proizilazi iz načina izvršenja djela i ličnosti počinioca, jer iz preduzetih radnji za koje je utvrđeno van svake razumne sumnje da postoje proizilazi da su preduzete svjesno i sa htijenjem, a nema okolnosti koje bi isključile postojanje osnovane sumnje da su radnje koje se optuženom stavlja na teret preduzete sa direktnim umišljajem, pa sud zaključuje da a postoji i da je ispunjen i subjektivni element bića krivičnog djela, jer osim navedenog optuženi je odrasla i zrela osoba koja zna da radnje koje mu se osnovanom sumnjom stavlja na teret su zabranjene, a iz načina izvršenja djela za koje se osnovano sumnjiči vidljivo je da je optuženi svjesno neovlašteno radi prodaje držao opojnu drogu, a iz kojih radnji se može zaključiti da postoji osnovana sumnja da su preduzete sa direktnim umišljajem, a iz samog iskaza optuženog vidljivo je da je isti znao da se radi o zakonom zabranjenim radnjama.

Prilikom donošenja odluke o vrsti i visini krivičnopravne sankcije ovaj sud je imao u vidu sve olakšavajuće i otežavajuće okolnosti predviđene članom 49. stav 1. i 2. KZ F BiH koje utiču da kazna bude manja ili veća, kao i naručito olakšavajuće okolnosti iz člana 50. stav 1. KZ FBiH.

Od olakšavajućih okolnosti sud je cijenio lične prilike optuženog i ponašanje optuženog tokom krivičnog postupka. Tako, optuženi je priznao krivnju što je doprinijelo efikasnijem okončanju krivičnog postupka, zatim da se radi o osobi “[...]”.

Sud je optuženom odmjerio jedinstvenu kaznu zatvora u trajanju od jedne godine, a nakon što je za krivično djelo iz tačke 1. optužnice utvrdio kaznu zatvora u trajanju od 8 mjeseci, a za krivično djelo iz tačke 2. optužnice kaznu zatvora u trajanju od 2 mjeseca, kao i nakon opozivanja ranije izrečene uvjetne osude, izričući sada kaznu zatvora u trajanju od 3(tri) mjeseca, kao utvrđenu, a cijeneći način učinjenja krivičnog djela, obzirom da je držao opojnu drogu u putničkom motornom vozilu, količinu pronađene opojne droge, a u sticaju sa neovlaštenim držanjem municije namjenjene za vatreno oružje kategorije „B“, za čije nabavljanje i posjedovanje je potrebno odobrenje, te opozivajući uvjetnu osudu, sud je izrekao kaznu zatvora u trajanju od 3(tri) mjeseca kao utvrđenu.

Dakle, radi se o osobi koja je prema Izvodu iz Kaznene evidencije izdržavala kazne zatvora za krivična djela koja su ista kao i krivična djela za koje se tereti i u ovom postupku, i to za krivično djelo iz člana 238. i 239. Krivičnog zakona Federacije BiH, kada je optuženom izrečena jedinstvena kazna zatvora u trajanju od tri mjeseca i petnaest dana 05.02.2010. godine (dakle skoro je prošlo više od 15 godina), kao i za krivično djelo iz čl. 73. stav 3. ZONDOM-a, u kojem postupku je optuženom izrečena kazna zatvora u trajanju od 3 mjeseca, a koja se neće



izvršiti ukoliko osuđeni ne izvrši novo krivično djelo u trajanju od 2 godine i to dana 19.08.2022. godine, a za koju izrečenu mjeru upozorenja je tužilaštvo zahtjevalo opoziv, zbog čega je neophodno bilo nastaviti sa izricanjem zatvorskih kazni.

Imajući u vidu navedene olakšavajuće i otežavajuće okolnosti, sud je primjenom člana 42., 43. i 49. stav 1. i 2., kao i 50. i 51. KZ F BiH i člana 238. sta 1. u vezi sa članom 55. KZ FBiH, optuženom V.S. za krivičnopravne radnje opisane u optužnici KTTK broj: T03 0 KT 0097283 21 od 26.05.2023.godine, a kvalifikovane kao krivično djelo - Neovlaštena proizvodnja i stavljanje u promet opojnih droga – iz člana 238. stav 1. Krivičnog zakona Federacije Bosne i Hercegovine u sticaju sa krivičnim djelom – Neovlašteno nabavljanje, držanje i prodaja municije– iz člana 73. stav 3. Zakona o oružju i municiji Tuzlanskog kantona (Službene novine Tuzlanskog kantona broj 17/2015), a nakon opozivanja izrečene mjere upozorenja i izricanja kazne zatvora u trajanju od 3(tri) mjeseca, kao utvrđene kazne zatvora u skladu sa članom 65. stav 1. KZ FBiH, a sve u vezi sa članom 54. istog Zakona, izrekao jedinstvenu kaznu zatvora u trajanju 1 (jedne) godine, pri tome nalazeći da je izrečena jedinstvena kazna srazmjerna težini učinjenog krivičnog djela i stepenu krivnje optuženog, smatrajući da će se izrečenom kaznom zatvora u cjelosti ostvariti svrha kažnjavanja propisana u članu 42. KZ F BiH.

Na osnovu člana 238. stav 4. u vezi sa članom 78. KZ FBiH, od optuženog je oduzeto i to: 4,835 grama praškaste materije smeđe boje, koja sadrži opojnu drogu heroin, dva dijela tablete bijele boje sa natpisom „Suboxone“, ukupne mase, 0,225 (0,138+0,087), žuta tableta mase 2,815 grama, ne sadrži psihoaktivne supstance, dio tablete žute boje mase 0,373 grama, 0,172 grama biljne materije koja sadrži tetrahidrocanabinol (THC), tableta od firme „Sanofi“ mase 0,092 grama i četiri (4) komada, od čega su 2 komada municije za 6,35x15,8 mm, 1 komad municije kalibra 9 x 18mm i 1 komad municije kalibra 9 x 19mm, koji predmeti će se dostaviti MUP-u TK-a nakon pravosnažnosti presude na dalji postupak, a obzirom da to navedena zakonska odredba decidno propisuje jer se radi o zabranjenim supstancama i predmetima.

Na osnovu člana 202. stav 4. ZKP-a F BiH optuženi V.S. se oslobađa plaćanja sudskog paušala zbog lošeg imovnog stanja.

Iz svih naprijed iznijetih razloga presuđeno je kao u izreci ove presude.

**Zapisničar**  
Begzada Šehić

**Sudija**  
Sanela Čajić

**PRAVNA POUKA:** Protiv ove presude dozvoljena je žalba u roku od 15 dana od dana prijema prepisa presude, Kantonalnom sudu u Tuzli putem ovog suda.